



洛陽九老祖龍學文集卷之十

雜文

歐陽文忠公除吏部侍郎告詞特為知制誥

先皇帝遺文投艱于朕躬俾守宗廟暮年于茲惟
是二三政事之臣輔朕不遠以底于治嘉乃勞止
是用疇庸推忠協謀佐理功臣金紫光祿大夫行
尚書戶部侍郎叅知政事柱國安樂郡開國公食
邑二千八百戶食實封八百戶歐陽修精識照于
古今高名起于日月文之以禮樂濟之以公忠頃

在先朝預聞大政逮予嗣訓之始繫爾定策之先
屬哀毀之過差感疾疹之甚美繫禱備至氣體詔
康苟非與在之艮曷見仰成之懿宜峻天臺之秩
庸昭國棟之隆褒德懋功于是乎在爾其夙夜茂
勉左右弼諧用乂我王家爾亦有無窮之聞豈不
休哉可特授行尚書吏部侍郎依前叅知政事功
臣散官勳封實馭封如故

為病設醮青詞

臣聞惠迪吉從違凶惟影響惟時上天鑒歟下厥

下克寅威罔惟無咎悔亦用集于多祉茲臣固常
聞于師而臣愚不明弗克率厥道以底于休反肆
志不類允宜速災疊于厥身今天謂愚無罰而猶
降疾以告戒俾休惕其心而臣夙夜靜惟先王之
訓儆懼不怠尚克惠迪以終有慶以承天惠惟天
聽在下必聞臣之言天而既告戒矣臣亦既儆懼
矣實期藥石所治以即康寧臣其有渝今日之言
惟天罰不敢違臣無任懇禱之至

進士策問三道

卷十

二

第一道

問古者井田之法作一而稅國用足民食不匱雖有凶荒兵革而無菜色者矣國家富有天下農田至廣賦稅亦厚益以山澤之產醴苻金珠犀象之利又征商榷酤獲其饒無凶荒兵革之事而國用不足民食匱者何也子極言其所以然而陳古道以教我

第二道

問儒者言聖人則必首孔子夫孔子之刪詩書定

禮樂贊易道脩春秋謂之六經茲固萬世不刊之書也孔氏序書則云斷自唐虞以下訖于周今之所存可考矣司馬遷作史記則有五帝本紀孔氏又以少昊顓頊高辛唐虞之書謂之五典司馬本紀則首黃帝刪紀亦既有異黃帝又復不同二者差殊豈無得失聖賢之旨乎子其辨焉

第三道

問夫子之文章著于詩載于傳所以垂世立教不為空言也其有並出書傳而旨遠不類非質于傳

識通儒則不能無惑且如書云兩造具備師聽五
辭及稱子路則曰片言折獄其由也與又若會于
夾谷云有文章者必有武備及對衛公問陳則曰
軍旅之事未之學也儻以兩造具備師聽五辭則
由也片言折獄何為而稱之苟有文事者必有武
備則衛公問陳何為而不對茲固學者之所常沈
研耽味也遲問其說以附于經

與盱江李泰伯五啓

其一

無擇再拜泰伯先生酷熱以來氣體何如驛置相
望不遠千里無階披奉祝增詹企法掾連君錫僕
之故人有文而願與人交泰伯見之當相得以驩
矣千萬善愛慰此多憶無擇手記頓首泰伯先生

六月十七日

其二

無擇啓累日前軍校過敝邑得泰伯所示書承起
居無他為慰甚深慶厯良言皆極當時之病真醫
國之書耳使今相天子宰天下者聞其言而行

卷十

四

之何憂乎獯鬻何患乎拓跋氏邪無擇踈賤不得
言于朝恭伯又俾附寄永叔即須良便致之也君
錫行日曾記奉書必得通上無擇近作愛堂銘與
文與序在君錫處宜往觀覽因風幸示可否之教
秋暑千萬善愛不宣無擇再拜 二十六日

其三

無擇自來淮楚以地遠且少便復吏事無餘暇故
不得時書拜徒自愧頌亡已足下之門人高弟
者曰陳生過聽不佞遣介走數千里惠然以書見

抵且示之策捧覽之際覩生面目茲足下之不鄙
遺我而俾之相示也顧愚何足以當之推轂之教
豈敢不勉趨奉來由惟祝善愛諸懇可期面會茲
不布萬一無擇再拜恭伯足下

四月九日
淮上書

其四

無擇再拜恭伯先生無擇嚮者居憂丹陽辱書者
再兼承見寄長篇及賦不任感仰然以道途阻遠
少遇信便無階至誠而望風依心靡忘終食也去
歲遇洪井見建昌牙校首詢動止且將附問乃先

生赴范杭州召已行矣又不得通區區于左右今
陳秀才人來捧所貶手足具悉起居如宜差尉詹
渴萬一無擇方此奔走披晤來日仰斲千萬為道
自愛愚懷所望無擇再拜恭伯先生

其五

無擇再拜恭伯先生言念久不附問惟劇詹馳夏
未抵袁即欲致記竊聞暫車寓泊洪井及詢諸相
識乃云他適蓋傳聞之不得審的耳介至忽捧手
墨承體局休佳殊尉區區敝郡已作學更三二月

可成當須坐邀長者來此為後生唱道此乃特專
遣人禮請次謹先此咨露秋涼希千萬若特加愛
懇乞無擇再拜八月二十三日

知袁州日謁仰山廟祝文

無擇謹以清酌之奠敢昭告于仰山之神大江之
西袁實小邦于京師為遠地世近守茲土者多不選
任重人非不才與有罪為時棄逐則不至焉無擇
不幸既不才且有罪其小邦遠地固所宜處既至
州三日與吏民相見矣然念雖小人不可不務為

君子蓋有志于君子則不以進退遠邇易其慮竊
惟幽明之際神人相依人克事神以誠神必祐人
以福苟無擇政有繆繇弗協于極以傷其和神其
降罰于無擇之身罔敢怨尤無作水旱疫癘災害
百姓尚饗

祈雨祝文

無擇謹以清酌之奠敢昭告于仰山之神惟袁之
民庇于神舊矣今天子以無擇有罪俾守茲土曾
暮月民以旱告無擇殊不知所以獲戾于神豈神
以朝廷謫無擇之身向存遺責而神責之乎不然
何當雨不雨使千里之內戴目而望膚寸之雲以
雨其田疇心憂且悲將繼之血無擇儻無罪而神
責之不明有罪而移其責于民不仁不明不仁虧
神之德其作霖雨以活百姓之命厥或後時雖雨
無益也尚饗

謝雨祝文

無擇謹以清酌庶羞之奠敢昭告于仰山之神歲
比無登民飢已盛公私匱乏不堪其憂田農之家

往也舉息錢以市種與牛乃克播種苟嘉穀未秀而膏澤斯愆則西成何望焉無擇不忍見此民將暫死于溝壑遂有禱于神蒙神哀之雨以時降闔境之內靡不霑足惟神之德大不可鬲非薦至誠罔以為報神其有終嚴惠無斃子成使民感神之德于無窮豈不休哉尚饗

秋祭祝文

無擇謹以清酌庶羞之奠敢昭告于仰山之神歲云秋矣百穀用成俾民小康乃神之賜恭修時祭

是謂報功神其永庇吾民食于茲土不已尚饗

春祭祝文

無擇謹以清酌庶羞之奠敢昭告于仰山之神月旅仲春農務東作百姓有倉箱之望三時無風雨之愆繫神降康俾民蒙福嚴申時祭其鑒至誠尚饗

祭韓文公祝文

皇祐五年十一月初一日築韓文公初堂落成以文安謝

嗟乎公之文章日光玉潔可學而式公之聞望太
山北斗可仰而尊公之篤道自比孟軻可從而信
公之經學為諸儒倡可從而效至于排闥浮圖力
抵萬乘竟謫于潮旋移于袁遺愛弗泯邦人是思
去古雖邈其風猶在無擇偶以罪譴出守于斯遐
思英風築宮以祠乃繪慮鄭暨公門人賢若湜翺
並列從祀比至落成為文以告諒公英爽其鑒于
茲尚饗

祭鄭官祝文

至和元年十二月初五日無擇廼建鄭
都官即中墳亭神像落成之後以文安

謝

無擇謹以脩負出守此土固當首尊又行以勵邦
俗則搜訪前賢遺迹距可後歟于是閱唐人登科
記則知公之名有素觀郡庠雲臺編則知公之詩
有體得佳城之故阡則知公之跡可仰故卜以吉
日高宗
唐諱以墳宇繪以亭像敬率郡僚以文告焉嗚呼
公之生也其亦人中之龍也而亡也其亦星辰山

嶽之歸也則夫所以修完墓宇者緊欲勵此邦之俗而俾後進之有所繼也區區之文靈其鑒焉尚饗

鼎州桃源觀題名

皇祐四年正月自廣東憲徒為湖北提

刑七月奉詔改廣東轉運使

予按部辰陽往來再經桃源觀時皇祐四年秋七

月己酉壬戌范陽祖無擇題

親書刻于觀中

堵田仰山新廟題名

自廣南東路轉運使以太常博士直集

賢院移知袁州皇祐五年六月五日到

任至和二年十二月十三日尚書比部

郎中翁及替罷

范陽祖無擇准制祭仰山神東平費武江夏黃本

南陽白文清洛陽林觀盱江李泰伯荊陽潘及甫

河東柳淇偕行至和元年夏四月庚戌淇書立石

殿下饗亭前

謝到任表

卷十

十

元豐六年神宗召起龍學典藩

臣無擇言昨奉勅命差臣知光州已于今月二十
六日到任交割管幹訖者受命以還視事伊始戴
恩懷懼震驚臣無擇中謝伏念臣已撫世系卑微
天姿謏薄偶緣尺寸之技誤塵甲乙之科遂自下
陳寢階近侍歲月滋久功效蔑聞夙夜勤勞過咎
深積果人言之是速在吏議以何處流竄累年飄
泊散地俯臨晚節仰被洪私復叨守土之榮實出
逢辰之幸茲蓋伏遇 皇帝陛下堯仁衛戩舜智

無為憫臣少被于搜揚察臣老流于荒裔遠從謫
籍復置列藩臣敢不捫心省過刻骨去非誓殫犬
馬之疲勞免擠溝壑之玷辱庶逃後悔尚蓋前愆
臣無任瞻天仰聖之至

洛陽九老祖龍學文集卷之十

卷十

十

七則次子題龍學文集卷之十一

洛陽九老祖龍學文集卷之十一
名臣賢士詩一十六首附

司馬溫公送龍學守陝 狀元呂椿龍學第
三名溫公第六名

教教空巖穴夫君集帝庭
辭華動丹宸光價塞青
冥峻德爭推轂榮途易建瓴
陸離寒水玉磊落曙
天星得喪誰先識艱虞困屢經
蹉跎涯注足漂泊
鳳凰翎粉署踈恩紀甘棠寄典刑
仁風思布獲疲
俗待綏寧賤子良多愧餘光
每乞靈題名聯土版
占籍偁民丁種心顛毛白蕭
隴栢青陌頭瞻皂

蓋獨立涕飄零

梅聖俞再咏送龍學赴陝府

古來分陝重猶有召公棠此樹且能久後人宜不
忘君從金馬去郡在鐵牛旁山色臨関險河聲出
地長蹲無空美魚必薦嘉魴天子憂民切行當
務勸桑

王荆公和龍學登紫微閣日為知制誥

漠上秋雲護掖垣青雲只在兩楹間宮樓唱罷雞
人遠門関朝歸虎士閑華蓋北瞻天帝座蓬萊東

想道家山却慙久此隨諸彦文彩初無豹一斑
又一首

掖門相對敞銅鑲轍上飛甍在兩間潤色平生知
地禁登臨此日愧身閑浮雲倒影杉窓隙落木回
颺動屋山忽憶初來秋向早紫微花點綠苔斑

梅聖俞送龍學北使

燕山常苦寒漢使涉靈臘路長人馬愁風急沙囊
雜宿造穹廬関行逢獵騎合獻先秃髮馳問驛華
言答每食冰上盤欲飲酒凍榼見其君長時國禮

何勤納中朝厚仁德四海望閭闔乃知日月光照
必垂夷匪歸米易輕裘賜對延英閣

司馬溫公晚春病起詩呈龍學

風日正和柔身輕喜病瘳懶拋殘蠹簡煖脫敝貂
裘值客開青眼逢花忘白頭家上好春色何日可
同游

朝議大夫上柱國致仕張徽聞龍學平昔

曾游潁川有西湖有詩以寄之

河勢橫斜帶地形碧游丹旆昔常經驛名未改風

塵黑碑字猶存雨蘚青薦福詩園林倡杏渺擷芳

亭洲妓娉婷汝南一值賢人降分野于今占德

星

張徽又送龍學和寄黃元之郎中詩是時

京在西

去持雙節去朝元玉陛猶虛侍從班
龜洛旧游天直上雞林新句海
中間品流有日歸陶冶隱逸無
時奉宴開鶴馭仙游何處所
軒皇冠劍在橋山

司馬溫公送龍學分司西京御史臺

人生榮與辱百變似浮雲自有窮通定徒勞得喪
分銷愁惟有酒娛意莫如文方寸常銷散其餘何
足云

康節先生邵雍字堯夫和龍學詩是時龍學知開

吾家職分是雲山不見雲山不解顏游興亦難分
日限夢魂都不到人間烟風欲極無涯樂軒冕何
嘗暫閑有洛日交朋屢思約幾時曾得畧依攀

邵康節又謝龍學詩時在西京

恩深骨髓為慈親義重山丘是故歸 過 陽舊
游地白雲收得薜蘿身

康節又寄龍學詩

三十年交舊相逢 白頭海壖曾共飲洛社又同
游脫履風波地開懷松桂秋 兩眉從此後應不卷
閑愁

曹司勳詩呈恩府龍學

曹公諱輔字子方登嘉祐八年乙科官
至朝奉郎守司勳郎中號靜常先生龍

學出鎮杭州司勳為杭州司法嘗舉之
此生飄泊住乾坤南北東西豈更論
萬里欲封傍墓土十年重到李膺門
少驚人事時千變盡付羈愁酒一樽
主上思賢厚風俗如公終未老丘園

盱江李恭伯題袁州東湖呈龍學

萬象城東雅入詩半湖雲謁捲殘輝
老龍惜雨慵離蟄幽路逢人慣不飛
岸僻自宜安釣石水清誰碍濯塵衣
使君公常游此却恐君王急詔歸

再呈

郡藏好景有東湖誰道蓬萊遠無路
水底芙蓉謾託根爭如岸上甘棠樹
客來坐見碧波中魚跳潑刺頰尾露
下釣不及呂尚賢明月清風又歸去

又寄龍學

衆人皆銳進唯我復幽居遠慮夢多亂
身閑氣不舒干求非祿位好尚豈詩書
日夜又日夜霜寒鬢髮疎

洛陽九老祖龍學文集卷之十一

洛陽九老祖龍學文集卷之十二
名臣賢士文九篇附

歐陽文忠公回答龍學手書

文忠公時為職官次年龍學第三名及
第

修啓人至蒙示書一通并詩賦雜文兩策論之曰
一覽以為何如某既陋不足以辱好學者之問又
其少賤而長窮其素所為足稱以取信于人亦嘗
有人問者以不問之愚而未嘗答人之問足下卒

然及之是以愧懼不知所言雖然不遠數百里走
使者以及門意厚禮勤何敢不報某聞古之學者
必嚴其師、嚴然後道尊道尊然後篤敬篤敬然
後能自守能自守然後果于用果于用然後不畏
而不遷三代之衰學校廢至西漢師道尚存故其
學者各守其經以自用是以漢之政理文章與其
當時之事後世莫及者其所從來深矣後世師法
漸壞而今世無學者則不尊嚴故自輕其道輕之
則不能至不至則不能篤信、不篤則不知所守

守不固則有所畏而物可移是故學者惟俯仰徇
時以希祿利為急至于忘本趨末流而不返夫以
不信不果之心守不至之學雖欲果于自用莫知
其所以用之、道又况有祿利之誘刑禍之懼以
遷之哉此足下所謂志古知道之士世所鮮而未
有合者由此也足下所謂文用意甚高卓然有不
顧世俗之心直欲自到于古人今世之人用心如
足下者有幾士則鄉曲之中能為足下之師者謂
誰交游之間能發足下之議論者為誰足下之言

高趣遠好善竊惟足下之交游能為足下稱才譽
美者不少今皆捨之遠而見及乃知足下是欲求
其不至此古之君子之用心也是以言之不敢隱
夫世無師矣學者當師經師經必先求其意：得
則心定心定則道純道純則充于中者實中充實
則發為文章輝光施于世者果致三代兩漢之學
不過此也足下患世未有合者而不棄其愚將某
以為合故取道此未知足下之意合否

歐陽文忠公又手書上龍學

修啓自擇之使還未嘗一得款奉書局之會幸出
偶爾遂成鄙句兼邀坐客同賦雖老拙非工而諸
君盛作亦聊記一時之事謹以附遞致誠當擇之
西行猶在齋禁不得瞻違實深為恨暑熱道路不
審台候如何惟冀以時自愛

王荊公手書上龍學求教

治教政令聖人之所謂文也書之策引而被之天
下之民一也聖人之于道也蓋心得之作而為治
教政令也則有本末先後權勢制義而一之于極

其書之策也則道其然而已矣彼漏者不然一適
焉一否焉非流焉則泥非過焉則不至甚者置其
本求之末當後者反先之無一焉不諄于極彼其
于道也非心得之也其書之策也獨能不諄耶故
書之策而善引而被之天下之民天下之民反不
善焉無矣二帝三王引而被之天下之民而善者
也孔子孟子書之策而善者也皆聖人也易地則
皆然某生千年而學十四年矣聖人之所謂文者
私有意也書之策則未也間或怫然動于事而出

于詞以警戒躬若施于朋友褊迫陋庠非敢謂之
文也乃者執事欲取而教之使獻焉雖自知明敢
目蓋耶謹書所謂書序原說若干篇曰叙所聞與
所志獻左右惟賜覽觀焉

王荊公又手書回答龍學

早學未成而仕又不能俛仰以赴時事之會居
非其好仕非其事又不能遠引以避小人之諂諛
此其所以為不肖而得罪于君子者而足下之所
知也往者足下遽不棄絕手書勤尚告以其所

不及幸甚幸甚顧私心尚有欲言未知可否試嘗言之某嘗以謂古者至治之世然後脩禮而致刑不脩禮之世非無禮也有所不脩耳故致刑之世非無刑也有所不致耳故某以江東得吏之大罪有所不洽而其小罪不知者以謂好伺人之小過以為明智者又以為不果以除惡然後怒者不資此亦為言乃某異于此以為方今之理勢未可以致刑致刑則刑重矣而所治者少不致刑則刑輕矣而治者多理勢固然也一路數千里之間吏方

苟簡自然狃于養交取容之俗而吾之治者五人小者罰金六者才絀一官而豈足以多乎工尹商陽非嗜殺人者猶殺三人而止以為不如是不足以反命某之事不幸而類此若夫為此紛々而無預于道之廢興則既亦知之矣抑所謂君子之仕行其義者切有意焉足下以為如何自江東日得毀于流俗之士傾吾心未嘗為之變則吾之所存固無以媚斯世而不能合乎流俗也及吾朋友亦以為言然後怵然自疑且有自悔之心徐自反念

古者一道德以同天下之俗士之有為于世也人
無異論今家異道人殊德又以愛憎喜怒變事實
而傳之則吾友庸詎非得于人之異論變事實之
傳而後疑我之言乎况足下知我深愛我厚吾之
所以日夜向往而不忘者安得不嘗試言吾之所
自為以冀足下之察我乎使我自為如此而可以
無非固大善即足下尚有以告我、使釋然知其
所以為罪雖吾往者已不及尚可以為來者之戒
幸留意之報我以無忽

鄭內翰獬行應奉山陵加食邑恩告詞時

鄭州

英考皇帝馭飛龍以昇真藏衣冠乎橋山萬國攬
涕竭蹶以趨事而一二藩輔之臣實奮屨績予嘉
爾勞茲有優數龍圖閣學士左諫議大夫知鄭州
祖無擇老于辭學將之以仁厚而擁節園田率其
所部合力以赴功米益精密無所漏遺廟祔已安
宜疇慶典增國舊封行之真食以庸制祿茲非懋
賞之公乎

李泰伯寄龍學長篇 是時龍學呼秘丞

我本山田人好尚與衆異平生重文游所得固無
幾昨者應茂才西行覲朝美時當慶曆初選舉實
多士范：帝王州恣：遠游子携錢質被屋乞火
蒸陳米鞍馬到即賣僮僕癡難使有時造公卿努
力向塵市數步則一歇長吁乃能起衣冠信質野
言語欠妩媚閣人顧之笑將命見而避往：得所
請踏：向前跪何能剖懷抱浪自慕尊貴：人如
天神喘息生雲氣野夫等麋鹿芻豢非所異歸來

坐空牕惆悵久不睡塵埃滿鬚鬢臭惡入口鼻業
已辭吾親中道豈可廢佹俛待報聞愁憂遂經歲
二年正月晦閑房適假寐有奴來啄門手披_上聲擇
之刺承命驚下床赤脚誤穿履從來未識面只是
間高第名顯官且達見我當何為再拜請舊席熟
視知可畏昂：貌甚古崖而掀氛縈渾：氣甚和
璞玉無芒銳高談貫先哲雅意在茲世昔人相過
問一言猶合氣今吾與擇之寧假再三計自此君
往還中心蔑疑貳如熱息廣厦如飢享盛饋君授

南康守舟維蔡河涘我館汴之陰前去路則邇時
時結帽帶踽々尋英軌衆人嬌綺羅相對紉蘭芷
朱絃自三歎笑殺彼鄭衛王命有期日都門一反
袂君行劇鴻軒我處近匏繫曠日及孟秋皇慈始
收試崇々九門開窈々三館秘主司隔簾幃欲望
不可跂中貴當振闐蒐索徧靴底呼名授之坐敗
席鋪冷地健兒直我前武怒足防備少小學能賢
謂可當賓禮一朝在檻穽兩目俱睜眦捉筆析所
問移時數千字讀書取大者纖息或靡記灸背雖

自竒寧當至尊意馬龍騰天衢駕駘合羞死量才
與揣命坦蕩更何事振衣托歸舟河流迅孤矢清
淮江且平踰月在枕几及過廬山南聞君初布治
船檣既入岸馬首已來暨迎我到府署相見共歡
喜嫩橘摘千苞肥魚斫十尾蕭晨徹骨清佳景邀
人醉高會雖暫歡故園當速至草々成別愁悠々
渡河水是時東方曙俄然北風厲陽鳥咸畏逝江
神以儒戲氣象斗不同波濤大可憐長帆張欲裂
孤舟蕩無倚或從玉井出或自銀山墜篙工斂手

立脉：無窮淚從者閉目坐嗟，不敢視我時撫
休歌分作長江鬼所悵生劬勞不孝而已矣禍福
果無妄險難行可弭脫身得平康引領望鄉里厥
後過浹日幸得見維梓入門何怡，饌具有甘旨
稚女能紉針驕兒偏生齒芟除閑草萊疏通舊治
注吾廬可終焉生計由此始郡守方仁賢學宮盛
修理踵門致勤恪命我談經藝麻衣何紛，鄉人
子若弟不惟務章句所欲興禮義施為有本末動
靜有綱紀蚤與雞同覺夜與月相值孳，忘飲食

斷：在文史持附南康詩或逢北來使尺素雖滿
前話言難到耳殆及三年冬聞君受朝寄名稱按
刑獄勢可平冤滯故人漸大任賤子羞自慰軒車
日已遠翰墨益難致薄命良可傷降灾渾未已
是年之季冬舉家傳疫癘老母尚委頓微能蓋螻蟻
形骸非我有魂魄與心離權柄在鬼物功力非服
餌曉突誰能炊午閔猶未啓荏苒再間月幸會天
不棄春風動枯槁甘雨澆根柢行，夏交秋吉微
凶不替高堂何戚，疾病日攢萃一夕脾臟間發

泄不復止詰朝問無言目瞑口齒閉號呶諸孫兒
雜沓大鼎沸嗟哉當彼時誠恐弗可諱鑿師相急
熱巫覡兩經緯藥草及酸辛法術殫怪詭薄暮乃
復蘇踰旬僅知味方茲戀庭闈旋已對獄吏試言
其所由內省亦無愧有人同州問發迹自徒隸竊
被儒衣裳曾亡小才技突如游京邑欲以于明睿
朝家焉可欺羈旅謀目濟乃造黃紙書便取青袍
衣乘船歸南方歛板謁當位自言章奏竒曰藉宦
官勢詔文降自中宰府不預議既然能占天且曰

善興利江淮一經過郡府不十帝到處爭逢迎莫
能思處置轉運苦愛竒得之如國器故使按坑冶
庶可長才智小人靡忖度假寵愈放肆行符索吏
卒圈印發轉遞閭閻望塵拜州縣從風靡遮道結
繒綵鋪筵塞珠翠車騎從後呵給使數百指何者
為典刑獨自誇瓜嘴在昔秦無人統朝贈之筮緊
我非聾聵碌々寧不耻作書貼諫官姦詐患不細
有詔令建捕按驗取真偽是命知計窮誣我以罪
戾上官猶眩惑準例皆拘係幽々園狎中憤々爭

統裏周旋二千日乃克見巧敝畫地尚不入叢棘
曷可冥惟茲謝吾母幾不全髮牀教道亦難行凡
庸豈同志吁哉養英材徒以釣積毀篋書歸敝廬
庠門任蕪穢去年仲夏後盛暑若火熾郊園有餘
爽蔬果即可嗜時復觀田疇畢力奉耘耔人生但
飽煖此外皆淫侈思君非一日欲去無雙翅俄聞
遷黃州又說下喪制古米聖與賢誰不遭醜詆蜀
日駭狗犬夏鼎愁魑魅人壽有短長孝子謾憂思
減性經所貶節哀禮為是矧夫王佐才簡在唐虞

際揚名以顯親報德豈不諱加飯苟如願蒼生猶
有恃適時匪我長才朽乃所擬道義果弗克富貴
反為累回憲本無官桀紂焉得比俗子但相非吾
心已居易近者游葛陂念君在襄泉作詩布幽懷
讀之勿嗤鄙

龍學依袁州學記

本朝慶曆中詔天下郡縣興崇學校皇
祐五年龍學自廣南東路轉運使移典
袁州下車之後廼議改學次年至和甲

午學成盱江李泰伯撰記刻石以識其事
京兆章友直篆額河東柳淇書世號三絕
熙寧元豐間館閣第天下學記以袁州為冠云

皇帝二十有三年制詔州縣立學惟時守令有拙
有愚有屈力卑慮祇順德意有假官僭師苟其文
書或連數城忘誦弦聲倡而不和教尼不行三十
有二年范陽祖君無擇知袁州始至進諸生知學
宮闕狀大懼人才放失儒效濶疏亡以稱上旨通

判潁州陳君侁聞而是之議以克合相僭夫子廟
陘隘不足改為乃營治之東厥土燥剛厥位面陽
殿材孔良殿堂門廡黝堊丹漆舉以法故生師有
舍庖廩有次百爾器備並手偕作工善吏勤晨夜
展力越明年成舍菜且有盱江李高宗庶諱諗于眾曰

惟四代之學攷諸經可見已秦以山西鑿六國欲
帝萬世劉氏一呼而閉門不守武夫健將賣降何
耶詩書之道廢人惟見利而不聞義焉耳孝武乘
豐富世祖出戎行皆孳、學術俗化之厚延于靈

猷草茅危言者折首而不悔功烈震主者聞命而
釋兵群雄相視不敢去臣位尚數十年教道之結
人心如此今代遭聖神爾袁得賢君俾爾由庠序
踐古人之迹天下治則裨禮樂以陶吾民一有不
幸猶當伏大節為臣死忠為子死孝使人有所賴
者且有所法是惟朝家教學之意若其弄筆以徼
利達而已豈徒二三子之羞抑為國者之憂此年
實至和甲子夏五月甲子記

袁州教授童宗說字夢弼春祭祖龍學

龍學祠元在州學右廡之前郡庠時祀
之偶坐而配饗者通判陳君侁也

維紹興二十九年歲次己卯三月丙辰朔十有一
日丙寅廸功郎充袁州學教授童宗說謹率在學
諸生以清酌庶羞之奠祭于前太守龍學祖公之
靈惟公學為儒宗政為吏師所居民富所去見思
皇祐五年來刺有文翁闕有常衮千載相望壅培
道本廸築新宮祠韓退之山斗昭揭俾民不迷廸
設經幃延李泰伯勒記在堂其先有赫廸修賢墓

表鄭都官忠厚之教如珠在盤迺開東湖立廉退
亭作遜亦異造次顛沛率人以誠既作泮宮既多受祉
報政還朝潤澤豐美遺愛訖今百有七年所憩所
羨甘棠在馬思公若慈父母雨露既濡選牲為酒
僕忝教官再拜祠下薦以馨香配以別駕公芳少
留猿春鶴秋無我數遺此邦是床尚饗

張尚書字定叟重修袁州學舍菜祭祖

龍學

尚書移其祠在州學講堂之西郡庠亦

繪尚書生祠與龍學祠堂俱焉學正孫堃代作

維淳熙五年歲次戊戌冬十有一月庚申朔初二
日辛酉通直郎權發遣袁州軍州事兼管内勸農
營田事張杓謹以清酌庶羞之奠敢昭告于建學
太守龍學祖公之靈惟公蒞政詳明富學粹深皇
祐五年來自禁林環瞻學宮地隘于偏至和甲午
乃克定遷生徒居西祀宮其東殿堂門廡屹然邃
崇歷載深遠圯陋弗治代或更制寢違雅規士莫
振耀喟然永歎豈無伊人熟意在泮杓視事三日

肅躬祇謁顧視迫陘惕汗背決廼議經制一新輪
與緬想遐風頃還舊觀工既畢事禮嚴舍菜載繪
遺像雍穆如對廼立公祠廼頌公德邦人之思是
儀是則繇今視古忝繼邦綬作新斯堂次詠所羨
率僚告成諸生在庭酌以清酌薦以惟馨公靈所
之星辰河嶽願言來燕以開後覺尚饗

浴陽九老祖龍學文集卷之十二



